

pour iamais, qui nous a rassemblez tous en nostre petite maisonnette, avec vne grande ioye & vn grád desir de luy offrir nos vies pour son seruice.

Le 4. Louys Amantacha Huró qui a esté baptisé en France, & instruit par nos Peres, & qui auoit fait merueille en son pays s'il n'eut esté pris des Anglois, se vint confesser & communier en nostre petite Chapelle. Il y auoit deux iours qu'il estoit descendu à Kebec, nous venant visiter dès le commencement de son arriuée, ie l'inuitay à penser vn petit à sa conscience, il me promit qu'il le feroit, aussi n'y a-il pas manqué.

Le 5. trois Capitaines de diuerses nations nous vindrent voir, nous leur môstrasmes quelques tableaux, taschant de leur faire entendre ce qu'ils representoient, nous les fismes manger, puis ie leur fis present à